

Apocalipse

Deuxu heka Joaõ-ò bede ritÿnynyre

1 ¹ Katyryriti-ki tahe bede aõmydÿÿnana roire. Kia heka Deuxu Jesuisi-ò ritÿnynyre. Idi Kristu Joaõ-ò ritÿnynyre. Aõhebo ele elemu rotÿÿnykre heka inydeereny riteòsinyreri, teòdu mahãdu wahe. Ýjuõ heka Kristu riteònyre Joaõ-ò ibutumu relyykemy, ritÿnynykemy. ² Iribi tahe Joaõ ibutumu relyyre. Kaki heka riritinyre. Kia heka ijyy rare. Jesuisi Kristu inatyhyna rare. ³ Inyõ katyryriti-di rariakeki, eysamy ratxireri. Inyõ kiamy roholakeki, eysamy ratxireri. Inyõ kia rityhynykeki, eysamy ratxireri. Bededÿÿnana dori iòhòmy ratxireri. Kia ibutumu rotÿÿnyke.

⁴ Jiarÿ heka, Joaõ wahe, dohodÿÿna mahãdu-ò watyryriti rewahinyreri. Debò inatxi reurò mahãdu Asia bede-ki watyryriti rewahinyreri.

Ruxetðena, ywina-wana adeereny kanakemy idi watxireri. Deuxu-ribi dori ratxireri, ihetxiu rare, tule ttiemy rarekre. Tii dori ruxetðena adee riwahinykre, tule irynana tyytyby riwahinyke, debò inatxi reurò mahãdu wahe.

⁵ Jesuisi Kristu tule adee kia riwahinykre. Tii tahe inatyhyna ijyydu rare. Tii juhuu rubu-ribi ixixadu rare. Tii ibutu iòlò dinodu heka tii rare. Tii inyluure. Inyòraru iny-ribi tii riwatareny tahãlubu òraru-ki.

⁶ Tii Xiwe wahidÿÿdu mahãduò ixidee riwinyre, inyboho wahe. Ibutumy ityhydÿÿdu heka xiwe wahidÿÿdu mahãdu wese rare, iòlò mahãdu wese wahe. Deuxu rekeàlàmyhÿke. Ibutumy wowydyna, ruru-wana heka Jesuisi Kristu-ò rawahidÿÿmy rarekre ihyy hyemy. Kie ⁷ Beteheke, tii biuwetykywo-ki naderi. Ibutumy iny tuu robikre. Irubudÿÿdu tule tuu robikre. Ibutumy iny rahinykre, robukre òraru-ki. Inatyhy rare. Kie.

⁸ Jiarÿ AA rare YY rare. Juhuu ludu rare, tule ikonana ludu rare. Deuxu jiarÿ rare ibutu ruru wahòrò rare. Aõu aõu jiarÿ watxiwãhãre.

⁹ Jiarÿ Joaõ rare, aityhydÿÿdu seriòre wahe. Jiarÿ tule awese aõhebo ratÿÿnyre. Jesuisi lòlòna òraru-ki. Patmos bedebute-ki jiarÿ ratxire, ròtena wese heka tai ratxire. Jesuisi inatyhyna dori retÿnynyre. ¹⁰ Nobitxuò heka jiarÿ aõma Deuxu

Tyutybytyhy wadee dobehede. Iu tahe rybeõ-ò raholare, jurõna wodÿÿ wese heka rare. ¹¹ Tahe wadee rarybere: —Biritinyke aõma ibutumy aõbo kai bobikre. Ibutumy dohodÿÿna mahãdu-ò kia tyuriti biwahinyke. Ka tyuriti tahe biteõnyke heka debò inatxi reurò hãwã-ò: Efesu hãwã-ò, Esmirna hãwã-ò, Pergamo hãwã-ò, Txiatira hãwã-ò, Sardesi hãwã-ò, Filadelfia hãwã-ò, Laodisia hãwã-ò. ¹² Retehera wahewo-ò mobo wadee rarybereò. Tahe debò inatxi reurò loosõna mynynalemy rabira, womati tÿrÿrÿÿle wahe. ¹³ Itya-ki tahe hãbuõ wese rare. Ityky urarehe heka ratxire. Iwereysana heka womati tÿrÿrÿÿ heka rare wyò wõtenu-ki roire. ¹⁴ Irade iurahakÿ ratximyhÿre. Iruè heka heõtÿ wese rare. ¹⁵ Iwa tahe bronze womati wese rare. Irybe wodÿÿ heka bee jiranahakÿ wese heka rare. ¹⁶ Iruruwe-ribi debò-ki heka taina debò inatxi reurò sõwe rimyre. Irybe mayrehe wiõtÿ wese iry-ribi rõhõnymyhÿre. Iõsÿny tahe txu tõtèe wese heka rare, itÿnytyhyre. ¹⁷ Kia ibutumy rabireu, jiarÿ resera bede-ò rubu wesemy. Tii ruruwe-ribi debò watyre-ki ritidire, rarybere: —Buberuõtÿhy! Jiarÿ juhuludu rare, ihewoludu rare. ¹⁸ Jiarÿ rurure, iribi tahe rexixare rubu-ribi, aõu aõu tahe jiarÿ watzireri. Tiu aruruõtÿhy. Rububede dinodu heka jiarÿ watzireri, ityre waruru rare. ¹⁹ Biritinyke ibutumy tuu tabita wiji. Tule aõbo idi kanakemy biritinyke. ²⁰ Adeè aritÿnynyke aõbo kia ibutumy rare. Debò inatxi reurò taina heka wadebò-ki rare. Kia taina heka dohodÿÿna mahãdu ÿju wese rare. Loosõna mynyna heka dohodÿÿna mahãdu wese rare.

2 ¹ Kia heka biritinyke Efesu dohodÿÿna ÿju-ò: —Kaa heka inyõ rybe rare. Tii taina debò inatxi reurò rimymy idi rÿimyhÿ iruruwe-ribi debò wahe. Tii loosõna mynyna yky-ki rariareri. Kia womati tÿrÿrÿÿhÿkÿ-di relere wahe. ² Aaõmysÿdÿÿna wiwihikÿ reeryre, awoxierysytere tule. Hãbu bina tiu aixerenaõna toite. Inyõ Deuxu deõdumy iximy uritere rybedu, teurihitenyte. Kia iruirybe teerytenyte. ³ Kaiboho tawoxieryterenytenyte. Tule aõhõkÿmy tatÿÿnytenyte waõraru-ki, wijile tule wahe. ⁴ Kiaremy tahe sohojile wadee ibinare. Iwese juhuru waluu wesemy aõkõ wiji ahãtenyte. ⁵ Kaiboho heka atyhyna-ribi ahewo-ò taddõsetenyte. Kiaremy ta idi bexinohõtÿnymy bexirãhÿbenyke. Iwese juhuru atximahãte wese, ixityre boibekemy. Kiamy aõkõkeki, aloosõna mynyna ay-ribi aritakre. ⁶ Kiaremy ta akireny sohojile awire wadee. Kaiboho heka Nikolaita mahãdu iaõaõna widÿÿ derarenyre wawesemy. ⁷ Iny rybeõ ijohona mahãdu bohobenyke Deuxu Tyutybytyhy rybe-ò timybo Ityhydÿÿdu mahãdu-ò rarybemyhÿre: —Inyõ õraruna ijesu ritakeki, tamy jiarÿ umytuedeõna ariwahinykre. Kia tahe Deuxu bederaty ritokre, Deuxu oworu-ki rÿimyhÿre wahe. Kia bederaty inyru wahidÿÿdu rare.

⁸ Kia heka biritinyke Esmirna dohodÿÿna ÿju-ò: —Kia heka Juhuuludu rybe rare, Ihewoludu rybe rare. Tii rurubile rexixare. ⁹ Aõhõkÿmy dÿÿnana reerymyhÿre. Uriterenodu wesemy toite. Ihãre tahe aõna aõnawiwi ahõrõreny rare. Aõludu mahãdu umy rarybereri ibinamy. Tiiboho Satanasi mahãdu roire. Judeu mahãdu aõkõ roire tiiboho tuu raryberẽhãre. ¹⁰ Buberuõtÿhy kaiboho! Aõhõkÿmy dÿÿnanaõ kanakre debò wiò txumy wahe. Tahe buberuõtÿhyke. Rõtenu-ki boibenykre. Burubenyke hãrele heka õbitimy biwatÿhynybenyke.

Iribi tahe irudÿÿna rataana adee ariwahinykre. ¹¹Kaiboho nohōti-di mahādu, boholake timybo Deuxu Tyytybytyhy heka ityhydÿÿdu mahādu-ò rarybemyhÿre.

¹²Kia heka biritinyke Pergamo dohodÿÿna ÿju-ò: —Kia inyò rybe rare. Tii mayrehe wiòtxuree dire:

¹³ —Jiarÿ reeryre asÿ, ahāwā wahe. Kaiboho Satanasisÿ-ki tasÿnyteri, irynana rareri wahe. Tahe Kaiboho aityhydÿÿna teriòtenynte. Tai tiiboho warybedu Antipasi òbiti rirubunyrehārele.

¹⁴Ihāre tahe akireny sohojile wadee ibinare. Ayreny-ki inyò Balaaõ erydÿÿna rityhynyre. Tii ihetxiu Balake òraruna-txi aatysydÿÿmy ribedeerydÿÿnyre resedÿÿkemy. Tii Israeli mahādu-ò rarybere:

—Xiwena aōma ide tahe biròbenyke tule òta tahe urihimÿò tahe ibinare.

¹⁵Tule ayreny-ki tahe Niolaita tohodÿÿna ijōreny rityhynyre, timybo rexiòrarunanykemy. Kia ibinare wadee. ¹⁶Tai marybeke tiiboho rexirahīkemy idi iribi rexixāwidÿÿnykemy. Tukōkeki, anakre warymayrehe wiòtxuree-di iòludumy areakre wou-ki. ¹⁷Iny nohōti-di mahādu, boholake Deuxu Tyytybytyhy rybe-ò timybo Ityhydÿÿdu mahādu-ò rarybemyhÿre: —Inyò òraruna ijesu ritakeki, tamy biu-ribi rÿsÿna rÿikre. Manauratyre-ki heka nii tÿmyra raritimy roire. Ōmo nii rieryōre. Tunidukrele rieryre.

¹⁸Kia heka biritinyke Txiatira dohodÿÿna ÿju-ò: —Kaa heka Deuxu Riòre Rybe rare. Irue heka heòty wese rare. Iwa bronze womati wese rare.

¹⁹Aaōmysÿdÿÿna reeryeri, luuna, ywina, tyhydÿÿna, juhūu ratyre wiji aaōmysÿdÿÿna. ²⁰Kiaremy tahe sohojile wadee ibinare: Kaiboho heka Jezabel teijemahātenynte. Kia hāwy dori Deuxumy rybedu ixi-di rare. Ihāre tahe òtaòtamy, xiwe rÿsÿmy rotohodÿÿmyhÿre, ritxoo hōrō wahe.

²¹Jiarÿ tule txiò reijere òtaòta-ribi ixāwikemy. Tahe tuuōhyyre. ²²Idi herina-ò arilidikre ihābu mahādu-wana. Tai aōhōkÿmy rotÿÿnyrenykre.

Tiiboho kia rexirāhīnyōrenykeki, tuu ele elemy ariwinykre. ²³Iriòre bina arirubunykre. Tai ibutumy aōwidÿÿnamyna ityhydÿÿdu mahādu riwaerykemy. Jiarÿ heka inywo erydu dori rare. Kiaremyta iny sohoji sohoji ariòwunykre. ²⁴Ayreny-ki tahe inyò rÿire. Tiiboho bedeeryna bina rityhynyrenyōre. Tiiboho bedeeryna bina rieryōhyyre. Txioinihe, bede ywina sira aōkō adeereny ariwahinykre. ²⁵Iwese kaiboho tetyhynynte wese wiji bityhynybenyhyke. Ele ele dori arehemynykre. ²⁶⁻²⁸Kaiboho heka òraruna ijesu bitakeki, adeereny ruru ariwahinykre. Kaiboho ihyymy wadeewimy biwinybenykeki, bede bede dinodu mahādumy boibebenyke, iwese ruru Waha-ribi remyra wese wahe. Tamywikeki womati òhòte-di bede bede mahādu rihukre, iwese butxi ribòhònnyre wese wahe. Tule adeereny ariwahinykre aōma biurasò taina wahe. ²⁹Iny nohōti-di mahādu, boholake Deuxu Tyytybytyhy rybe-ò, timybo tii ityhydÿÿdu mahādu-ò rarybemyhÿre.

3 ¹Kia heka biritinyke Sardesi dohodÿÿna ÿju-ò: —Deuxu Tyytybytyhy debò inatxi reurò dinodu, taina debò inatxi reurò dinodu kia rybe rare:

—Aõhebo tatỹnynmahãtenyete reerymyhỹre. Arumy anireny ratỹnynmyhỹre ihãre tahe tarumy ahãtenyete. ²Bexirawahatebenyke ainatyhydỹyna-ki, urikõ-ribi kiemy ixãwiheny. Deuxuko-ki awityhymy aõkõ xixi-di textiemyhỹtenyete. Kia reerymyhỹre aõmysỹdỹnareny tewinymahãte. ³Inatyhyna juhu taholatenytedi, bexinohõtinybenyke. Idi bityhynybenyke aõnanabina-ribi bexirãhike. Tukõkreki wasidu wese ierykõmy adeereny anakre. ⁴Ihãre tahe Sardesi hãwã-ki inyõ reximymy õbitimy rarekremy ihỹre. Tiiboho wahe-ki tyky lyra urahakỹ-di kanariarenkyre kiemy dori õbitimy reximyrenyete. ⁵Mobo rõtarenkyre, tyurahakỹ-di rexitynyrenyete. Inireny Rutyryiti-ribi aritaõtyhy. Idi Wahakõ-õ wahõrõrenymy aritỹnykre tule iỹjuko-ki. ⁶Kaiboho nohõti-di mahãdu, boholake timybo Deuxu Tyytybytyhy heka, ityhydỹydu mahãdu-õ rarybemyhỹre.

⁷Kia heka Filadelfia dohodỹyna yju-õ biritinyke: —Kaheka inatyhymy Deuxu deõdỹyna rybe rare, õbitimy nodu wahe. Tii Davi ijõ rayna dinodu rare. Tii ijõ riraynykeki tiu inyõ riratõbõnyõtyhy. Tii riratõbõnykeki tiu iny riraynyõtyhy. ⁸Aõhebo tatỹnynmahãtenyete reeryete. Akyhynakõmy atximahãtenyetye rierete warybe dori tetyhynymyhỹtenyete. Tai ijõ adeereny reraynra. Tii inyõ riratõbõnyõtyhy. ⁹Bodoholabenkyre. Satanasi mahãdu heka Judeumy rexininimyhỹre tukõdu hãrele. Idi adidydenkyre akoreny-õ tatiowotimy kedeseke. Iu aluurenymy riwaeryrenkyre. ¹⁰Aõhõkỹmy dỹynana kanake ibutumy iny urihidỹymy. Kaiboho warybe tetyhynya, ywina-di tetyhynya. Tai ilau arayrubunyenkyre. ¹¹Ele elemy dori adehemynkyre. Ahõrõreny biyrubunyenkyre inyõ aribi rawasinyheny arudỹyna rataana wahe. ¹²Oraruna ijesu inyõ ritakeki. Tii ixbyby rubumy ruruõkre. Tii Deuxu heto-ki rasỹnyihyykre. Deuxuni ityre raritinykre tule Kristuni tỹmyra wahe. Jerusaleni tỹmyra tule ityre raritidỹymy rỹikre, biu-ribi dobehede wahe. ¹³—Iny nohõti-di mahãdu, boholake Deuxu Tyytybytyhy rybe-õ timybo ityhydỹydu mahãdu-õ rarybemyhỹre.

¹⁴Laodisia hãwã dohodỹyna mahãdu yju-õ heka biritinyke: —Kie rybe kaa rare. Tii inatyhyna inatyhy rybe rare. Tii Deuxu-wana bedede relereu, ratximyhỹ. ¹⁵Aõhebo tatỹnynmyhỹtenyete ibutumy reeryete. Ainatyhyna-ki inatyhymy aõkõ, txiõlemy aõkõ toite tule. ¹⁶Tai tahe iõraru-ki xixi-ribi aratarenkyre rexinohõtinyete. ¹⁷Kaiboho tarybetenyete: —Waaõwiwi-di roire. Awityhymy watxirenyereri. Wadeereny aõ rasiranyõhyereri. Idi urile texibõnytenyeri. Kaiboho dori abina, iaõkõ mahãdu, adehekỹ, aruety toite. ¹⁸Kia aratohonykre: —Waribi womati tỹrỹrỹhỹkỹ aworibityhy biõbranykre, aityhynamy wiwihikỹ. Tasỹse tyyurahakỹ tule, ade wõtenamy. Tasỹse rueluahina tule, arue ywinamy. ¹⁹Waluuna mahãdu õhõte-di aribedeerynymyhỹre warybemy tule. Tahe eryrewemy aõsusu-ribi bexitabenkyre wadee. ²⁰Bodoholabenkyre. Ijõ-ki rarymy watxireri. Inyõ roholakeki ihetowo-õ aralokre. Tai tii-wana ariroxikre. ²¹Oraruna ijesu inyõ ritakeki, tii wawana waryna-txi ronykre iwese jiarỹ waha-wana nadonymyhỹde wese. Rõtare dori wawouna-ki. ²²Iny nohõti-di mahãdu, boholake Deuxu Tyytybytyhy rybe-õ, timybo tii ityhydỹydu mahãdu-õ rarybemyhỹre.

4 ¹Iribi tahe biu-ki ijòmý rabira rasina wese. Rybeõ raholare, jurònajurò wesemy. Iwese wadee rarybere wese. Kiamy narybede: —Mana òwònyke, aõhebo itxõmo rahudi rotÿÿnykre ini ariteòsinykre. ²Iule tahe Deuxu Tyytybytyhy riwamyre. Iu, inyõ rynanamy rabira biu-ki. ³Iòsÿny heka roosònymyhÿre womatiwihikÿ rÿsÿ wese, Jaspe wesena, Sadonio wese. Uwajiò wixira tÿre heka rare iryna rirurawonyre. ⁴Tahe 24 ryna iryna rirurawonyre. Ityre tahe 24my wedu mahãdu ronyre tyyurahakÿ-di. Irati-ki womati tÿrÿrÿhÿkÿ-di rarataanany. ⁵Biudela, biumyta, irynana-ribi dohonyde. Heòtyloo heka debo inatxi reuròmý sòwe iko-ki rÿire. Kia heka Deuxu Tyytybytyhy tuu sòwedu rare. ⁶Tule iko-ki mana aho roire iuramy raurananyre. Irurawona-ki wiòwiò-ki aõni inaubiòwa räire, irue sòwe ihewo-ki, iko-ki. ⁷Aõni delena heka hãldehekÿ wese rare. Ijõ heka karòtihikÿ wese rare. Ijõ tahe hãbu òsÿny wese rare. Ikonanareny tahe nawihikÿ dowòmý nade wese rare. ⁸Ibutumy tiiboho debò sohoji reuròmý tesòwereny. Ta tiiboho tetya wirawyò rawyò irue dire. Tahe tiiboho rexielehynyòhyylemy txumy rummy rawiunymyhÿ: —Òbitityhy tate, Òbitityhy tate, Òbitityhy tate Inynyrÿ Deuxu rurutere. Kai tate, tule kai mabekre. ⁹Kia heka inaubiòwa boho rawiunyre: —Wowydyna, àlàna-wana rynana-ki rÿdu-ò, iki kiemy nodu-ò wahe. ¹⁰Iu tahe 24 wedu mahãdu heka tatiowotimý taòsÿny sutxi ritidimý riwowydynymyhÿreny resemy iko-ò. Tamy tarataana-di rehumy raryberenyre. ¹¹—Wadinodureny, waDeuxureny adee sohojile heka wowydyna, loosòna, àlàna rawahike. Ibutumy dori aõna aõna tewinyte. Adeewimý rÿimyhÿre idi rariamyhÿreny.

5 ¹Ryna-ki rÿdu ruruna debò-ki heka tyyriti werywery wesemy rabira. Tyyriti tahe wirawyò rawyò-ki iriti dire, tii debò inatxi reurò iratòbòna sòwe. ²ÿju ruru ruruhukÿ-my ryrymy dÿÿraxi-di: —Mobo ityhykre tyyriti ratòbòna aresydÿÿdukre iraydÿÿ-ki tule. ³Tai tahe inyõ ijõhyre: —Biu-ki, bede-ki, surawo-ki ijoõhyre. ⁴Inyõ ityhyõre iraydÿÿ-ki tamy itxere-ki. Iòraru-ki ta urile jiarÿ rahinymyhÿre. ⁵Iule tahe matuariò wadee narybede: —Hiõmyke, betehe ta inihe Juda mahãdu hãldehekÿ-ò, Iòlò Davi iriòre riòre wahe. Tii dori tyyriti ratòbòna riorokre idi riraynykre, tii sohojile dori wou-ribi ròtare. ⁶Kiamy tahe rabira, Budoeni Riòre wahe. Tii rynana ubey-ki rÿimyhÿ. Aõni inaubiòwa ijõre. Tiiboho-wana tahe matuari mahãdu rÿire. Budoeni rurure wesemy rÿire. Iò tahe debò inatxi reurò rare. Irue tahe tule. Kia rare Deuxu Tyytybyò rare, tii bede bedemy nodu mahãdu. ⁷Budoeni riòre tahe rynana-ki rÿdu ruru debò-ribi ditade, aõma tyyriti wahe. ⁸Iule ta aõni inaubiòwa, 24 matuari boho-wana tatiowotimý rejujure budòeni riòreko-ò. Tii sohoji sohoji wiuna-di, womati tÿrÿrÿhÿkÿ hyna-di ratximyhÿreny. Sohoji sohojiro-ki tahe òwòrusò wydysilÿnywi-di wese rare. Kia Deuxu tyhydÿÿdu mahãdu ixitòedÿÿna violão wese tule ratximyhÿreny. ⁹Tiiboho wiutÿmyramy rawiunymyhÿreny kamy wahe:

—Kai atyhy tate Tyyriti raydÿÿ-ò, iratòbòna eresydu tule. Arubumy heka Deuxu-ò Ixÿju ixÿju teòbranyte. Irybe wixira wixira, ibede wixira wixira iixÿjuna tule.

¹⁰Iòlòmý tewasynytenyete Deuxu dee tule xiwena wahidỹny mahādu wahe. Idi hāwā hāwā ariwedunyrenykremy. ¹¹Ŷju sōwetyhymy rabira rynana werora-ki, aōniboho matuariboho tule. Miliaō hōkỹmy rasōwerenyre. ¹²Tiiboho rirajuahakỹmy rawiunymyhỹrenyre: —Wowydyna, ruruna, deysana, àlana, loosōna tamy sohojile rawahinyrenyke buddeni riōre-ò. Tii dori rurure ityhymy ¹³Tai tahe ibutumy biu iròdu iròdu, suityre iròdu, bera iròdu iròdu ibutumy aōna tule rawiunymyhỹrenyre rynana-ki rỹdu-ò. Budoeni riōre-ò tule kia rawiunymyhỹre. Rarehykyle, rarehykyle heka rarekre. Kie. ¹⁴Aōni inaubiōwa rirawỹnyre: —Kie, Matuari 24 tahe reserenyre iko, kiemy noduko-ò.

6 ¹Tahe Budoeni riōre heka tyriti ratòbōnaō rioròre. Kiamy rabire. Tule aōni inaubiōwa mahādu-ò narybede rybenihikỹmy biumyta wodỹ wese. Mana ini itxeremy. ²Tai retehere awaru urahakỹmy rabire. Tairỹdu iwaxiwahate dire. Tamy irudỹna rataana riwahinyrenyre. Tahe rare wou ròtakremy.

³Tahe ijō ratòbōna riorore. Ijō aōni tahe narybede inatxina wahe: —Mana ini itxeremy. ⁴Idi awaru sòhòkỹ ròhònyre. Inyō ityre rỹdu-ò ruruna riwahinyre, wou ritelenykemy bede bedemy. Tai hābu mahādu wii rahukremy. Tule inyō mayrehe ityre rỹdu-ò riwahinyre.

⁵Tahe inataōna ratòbōna riraynyre. Ixyby inataōna aōni rybe-ò raholare: —Mana ini itxeremy. Tai retehere. Awaru lybymy rabire, ityre rỹdu urihina-di tebò-ki. ⁶Tahe aōniy-ribi rybeō-ò raholare: —Womati nieru sohoji-di heka urihina sohojile heka trigo rawykre, txusohoji aōmysỹdỹna òwy wahe. Tule inataō urihina sevada rawykre, txusohoji aōmysỹdỹna òwy. Uritere ta uva-ò, adỹ-ò aōhe isỹdỹōmykre.

⁷Tahe inaubiōwana ratòbōna riraynyre, Budoeni riōre wahe. Ixyby inataōna aōni rybe-ò raholare: —Mana ini itxeremy. ⁸Tai retehere. Awaru bisamadòbòlỹre wesemy rabire. Ityre-ki rỹdu heka Rubu inire, heòty bede rubunana iheludumy. Inyō ityre rỹdu-ò ruru riwahinyre. Tai ròhònyre iny rirubunykremy. Inaubiōwa iny-ribi heka, sohoji rirubunykremy. Wou-ki, rama desemy, rubutyhy-di, iròdu debure-di heka iny rurure.

⁹Tahe iruyrena ratòbōna riraynyre. Tahe Xiwena wahedỹna rawo-ki iny mahādu rabire Deuxu rybe òraru-ki, tatyhydỹna òraru-ki rururenyre mahādu wahe. ¹⁰Tiiboho rirajuamyhỹre: —Deuxu Inynyrỹhỹkỹ, kai tyhy tate, òbiti tule. Tiu wexi waòwyreny bilidikre, warubudỹdureny-ò? ¹¹Tahe iximynamynamy tyyurahakỹ-di rexitynyrenyre. Tahe tamyreny rarybere urihimyo rexielehinyrenykre. Ijoiireny iwesereny rurukreu riraòrenykremy. Isōwereny rexihureu wahe.

¹²Tahe debò sohoji reuròna ratòbōna riraynyre. Kiata idi suu ramytyware inihikỹmy. Txuu urile rurunyre, ahādu isòmý relere, halubusò wese. ¹³Taina tahe sutxi dejujude iwese bederaty yhydebore ritxiwimyhỹre wese. ¹⁴Biu titxibo ikòre, iwese tyriti rarasemyhỹre wese. Ibutumy hāwālò bedebute tule taherina-ribi ratare. ¹⁵Iu tahe ibutumy iny rexiwore hāloohokỹwo-ò, manahakỹ hewo-ò tule. Tii roire Iòlò mahādu, bededinodu mahādu, soldado

dinodu mahādu, ityhy mahādu irurutere mahādu, ibutumy ijō mahādu rexiwore. ¹⁶ Tahe taixiwotena-ribi rirajuamyh̄yrenyre: —Watxireny mana heka bedesede rynana-ki r̄ydu lau rekexiwōrenykeny. Budoeni riōre debure lau tule. ¹⁷ Deburena txu, kyarana txu heka reare tamy, mobo riijekre.

7 ¹ Idi tahe inaubiōwa ŷjumy heka tuu rabire. Tiiboho heka inaubiōwa bedehitxihitxi bedemy r̄yire. Tahe rimyrenyre yhyhyk̄y tebò-ki heka rimyrenyre. Tiu heka òwòru radeō rayk̄yhyky roire. Bede-ki aōkō, aho-ki aōkō rebònyra? ²⁻³ Tule ijōmy rabire ŷjuōmy ibryra-ribi rarerimy. Deuxu irumy nonadu hāletena nihik̄y wid̄ȳna heka diwymy idi nade. Iribi tahe inaubiōwa ŷju-ò tii rryyre: —Txiokre inihe. Iwotōmod̄ȳōmyke wa suu, bee, òwòru. (Kia ŷju mahādu dori, bede, bero, wotōmod̄ȳōdu mahādu ih̄yre.) Biraòriōreke heka Deuxu hāletena deòdu òru-ò aritidikre. ⁴⁻⁸ Tiwesebo kia ritid̄ȳna rimymy idi rare. Tahe raholare heka jiar̄y tiweserebo. Ta 144.000 iny ibutumy. Israeli ijoi waòinatxi reurò kia ijoimy heka ixidee rimyre. Sohoji sohoji ijoi-ribi 12.000 inymy heka rimyre: Juda ijoi-ribi, Gade ijoi-ribi, Asser ijoi-ribi, Naftali ijoi-ribi, Manases ijoi-ribi, Simeao ijoi-ribi, Levi ijoi-ribi, Issacar ijoi-ribi, Zebulò ijoi-ribi, Jyje ijoi-ribi, Benjami ijoi-ribi, Kia ibutu ijoi-ribi heka 12000 inymy rimyre.

⁹ Iribi tahe sōwemy inymy rabire. Timy heka idi wariramahāduōkre. Ibutu 12.000 hāwā hāwā-ribi wirotyre. Bede ibutu rybe wixira wixira rybedu ibutu ijoi wixira wahe. Tai tahe Budoeniube-ò tiiboho rotamanyrenyre. Budoeniko-txi ryanako-txi wirotyre. Ibutumy tiiboho ityurahak̄ylemy roiremy. Horeni iru-di heka roiremyh̄y. ¹⁰ Tahe rryrenyre — irariemy rryrenyre: —Biu-ò hena waDeuxu-ribi nade rynana nihik̄y-ki ronyreri. Tule Budoeni-ribi nade. ¹¹⁻¹² Tahe ŷju ibutumy heka widotyde ryanawerora-ò, tule matuari mahādu tule iwo-ki. Inaubiōwa aōni ibutumy reserenyre rynana nihik̄yko-txi resere taòsana sutxi ritidimy Deuxu kia wowydynamy relere. Kie, myheka rarybere: —Wowydyna, Bedeeryd̄ȳna, dealàna, loosòna, aruru, aixiòlòd̄ȳna. Ibutumy heka kia kanakre inyDeuxu-ò. Rarehykyle, rarehykyle heka rarekre. Kie. ¹³ Tahe wawio inaubiōwa matuari mahāduō wadee r̄ȳraxire: —Kai aōbo teerymahāte kia tykyurahak̄y-di ratxirenyreriò, tule tiribibo ròireri? ¹⁴ Tahe rarybere: —Aōkōre wanyr̄y, reerykōre. Bedelyyke wako. Tahe wako tuu delyyde. Kia heka dòhònyde heka aōhòkymy d̄ȳnana-ribi dòhònyde rare. Ityky rityranyre heka Budoeni riōre hālubu-di. ¹⁵ Taiki heka rynana nihik̄yko-ki ratxirenyreri Deuxuko-ki. Kaheka ruu, txuu-wana heka rāāhimy ratximyh̄yrenyre taheto beded̄ȳnana-ki. Kia rynana-ki r̄ydu tahe riyrubunyrenykre. ¹⁶ Tiu rama rirubud̄ȳrenyōmy heka bemomo boho. Tiu txutòteehék̄y-wana wiris̄nyōtyhy ybòtò boho-wana, txutyte boho-wana. ¹⁷ Budoeni riōre dori rynana nihik̄yko-ki ratximyh̄yre. Tii heka arȳna adee riwahinymyh̄ykre. Tii heka adi itxeredukre heka aradykre heka Umyituedeōna ube-ò. Deuxu irube rirubud̄ȳnykre.

8 ¹ Budoeni riōre debò inatxi reurò hāletenamy ribhònyreu, aōdee biu-ki roholaòhyyre heka byy, myle roire: aōwod̄ȳ wod̄ȳhomy aōkō. Wadee



(Apocalipse 8.6)

meia hora txumy bedemy bede rewyre. ²Debò inatxi reurò ÿjumy tuu rabire Deuxuko-ki nyidemy. Tahe inyõ tamy riõremy idi retehere debò inatxi reurò ajurõnamy.

³⁻⁴Tahe iwitxira ÿju nade. Tii womati tÿrÿrÿhÿkÿ atara nihikÿ.

Tahe xiwenatyre orarade rÿny

wihikÿ ritoonyre. Inyõ riwahinyre ÿju-dee sõwemy. Riurinykemy Deuxu ijoy ixitòedÿÿna-wana xiwenatyre-ò risòkemy aderõna rÿnyrehekÿ heka womati tÿrÿrÿ xiwenatyre-ki ritxiwire Deuxu ryanako-txi. ÿju iribi tahe kia ibutumy raðwõnyre Deuxu-ò. ⁵Tahe heòty-di heka ÿju atara ritÿxinyra idi heòty-di rehure biu-ribi bede-ò. Tai tahe biumytxi ramytxynihikÿnyre heka suu biu tawe rihetenyre rybe wese wodÿÿ ramytatare.

⁶Tahe debò inatxi reurò ÿjumy heka rexiwinyry rÿire ajurõna-di jurònykremy.

⁷Juhu ÿju heka rurõnyre. Iribi tahe bedejutytyhykÿ heòty hãlubu-wana raurinymy bede-ò rejuxunyre. Bedejura tahe roomyhÿ asirade, bedero-wana inataõ-ribi, sohoji roomyhÿ.

⁸⁻⁹Iribi ihewoludu txurõna-di rurõnyre. Tahe berahakÿ-ò resere hãwãlò nihikÿ wesemy. Tai ibutumy heòtylawò txuramy ituere. Iyre bee tahe hãlubuhukÿlemy relere. Iyre utura tahe ituere.

¹⁰Tahe ihewoluduhe txurõna-di rurõnyre. Iribi tahe tainahakÿõ berohokÿyre-txi resere berayre-txi tule. ¹¹Tainahakÿ heka ihyre inire. Tahe sõwemy iny ituere ihyre bee riurinyreki.

¹²Tahe ihewotyhy tyaludu txurõna-di rurõnyre. Tahe aõwesele txutyemy txuu roosõohÿyre. Tahe ahãdu tawekremy turutyhy inihe relere taina tule. Tahe bederuruntyhyre heka.

¹³Tahe idi retehemy jiarÿ rãiwãhã. Tahe tuu rabire nawii nihikÿõ ruòmÿ ratxireriõ. Tii iryru-di heka rarybemyhÿ: —Bede heka rabinakre. Bede heka rabinakre. Suludu bede iny-ò ryrymyhÿ: —Txioinihe sõwemy aõbina binahakÿ rexiòtÿmyranykre. Tahe hewotyhyludu ÿju txurõna-di kudurõnykre heka bede rabinatyhykre.

9 ¹Ijõ ÿju tajurõna rurõnyre. Tii heka iruyre hewoludu rare. Tahe ijõ inymy rabire. Biu-ribi suò taina resere wese tii resere. Tamy ijõ raynaõ diwahinyde, hãloo nihikÿ ratòbõna rayna wahe. Hãloo nihikÿ heka irehehekÿ rare. ²Tahe riraynyre. Wãdãsi iribi tahe dòhõnyde. Iwese tahe bede rurunyre wawerorarenÿ-di. Txuu, ibutumy rurunyre wãdãsi lybyhykÿ òraru-ki. ³Tahe seihiikÿlyby wese heka wãdàÿ-ribi dòhõnyde tahe desede suò. Seihe heka itytibòròhòkÿ wese heka ihe rare. ⁴Asi rubudÿÿòmÿkre bederaradeõ tule, òwòru tule. Inyõ Deuxu kia ritidÿÿna iòru-ki rÿiòkeki, tahe tule tamy ijira rÿÿkre. ⁵Iny rubudÿÿmy aõkõre. Tahe iny aõhòkÿmy rotÿÿnykemyre heka

iruyre ahādumy. Aōhōkŷmy rotŷŷnymyhŷre kia ihe juberereri riijererimy ihŷre. ⁶Kia txuu tahe ixirubudŷŷmy reamyhŷre. Tahe aōkōre heka timyhe ixirubudŷŷkōmy tamyhe rubu dehemynŷōhyymyhŷde. Tukemy heka riwisŷnymyhŷre. Tahe aōkōre rubu iribi rahenymyhŷre. ⁷Seihikŷ heka awaru wese rare. Iwese awaru rexiywinymy wou-ki ralōkremy rŷimyhŷre wese heka rare. Irati-ki rŷire womati tŷrŷŷhŷkŷle irataana wahe. Iōsana heka iny ōsana wese rare. ⁸Irade irehehekŷre hāwyy radehekŷ wesele. Txuu tahe leaō juhukŷ wesele rare. ⁹Wyhy itxena ibreti-ki roimyhŷre. Womatile ibreti rare. Bede heka urile rawodŷŷnyhŷkŷmyhŷre. Iwese tewe awaru-di nodu sōwe iwodŷŷ rare. Iwese aōbina-ō rajaramyhŷre wodŷŷ wese wahe. ¹⁰Seihikŷ heka bōrōhywe nihikŷ wese heka rare. Tahe iruru-di rare. Iny riwotōmonymyhŷkemy iruyre ahādumyhŷmy. Iherona ramytxytxyire iruyre ahādumyhŷmy. ¹¹Iiōlō heka hāloo rahejihikŷ wedu heka rare. Ini heka hebreu rybe, Abadu rare. Grego rybe heka, Apoliō heka rare. Iny rybe heka iny hādu hāduhukŷ rare.

¹²Juhuu bedebinahakŷ ituera rōhōnyra. Katahe ijō iwitxira kōdōhōnykre inatximyhŷmy wahe.

¹³Ijō ŷju tajurōna-di rurōnyre. Tii heka debō sohoji hewoludu rare. Raholare heka rybeō-ō. Womati xiwenaō-ribi rōhōnyre. Xiwena-ō heka inaubiōwa sōwe. Kia womati tŷrŷrŷ xiwena heka Deuxu ryanako rŷire. ¹⁴Kia ŷju-ō heka rarybere ijurōna dinodu wahe: —Inaubiōwa ŷju besedŷŷnyke ixinamy rōhōnyke. Tii heka Bero nihikŷ rōtena-ki, bero Eufatesi-ki. ¹⁵Tii heka rōtena-ki ratximyhŷre kia bededŷŷnanau, kia txuu, kia ahāduu kia beōrau. Iribi tahe riōlōdŷŷnyrenyre. Iribi tahe ihewoludu iny ibutumy rahure. Iyreyre inataō hāwā jurajuramy heka rahure. Inataō jura-ribi sohoji sohoji rirubunyre. ¹⁶Tahe jiarŷ raholare tiweserebo aōbinadumy rŷire. Iny 200.000.000 inymy rŷire. ¹⁷Tahe aōbinadumy rabira awaru tyre ronyreri. Awaru tyre ludu tahe iwyyhy itxena dire. Ibutumy wako-ki rŷire. Ibutumy rabire. Womatihikŷle, heōtyhykŷwesele heka rare. Ijō heka tŷreura rare safira wese. Ijō tahe tŷre raramadōbō wesele. Awaru rati heka leaō ratihikŷ wesele rare. Heōtyle iry-ribi rōhōnyreri wādāsi enxofre-wana wahe. ¹⁸Kia heōty heka inataō jura-ribi sohoji jura iny rahure. ¹⁹Tule awaru nohewōru heka iruru dire. Iryribile tahe iheōty rōhōnyre. Taile iruru rare. Hemylala rati wese dire rurōmy heka inatxi hemylala juwesele. ²⁰Iny ituere sŷtybymy tahe rarōnyre. Deuxu deālana dee heka reōbyōhyre. Diabo mahādu luulemy ratximyhŷrenyre. Aōma rityhnyrenyre womati tŷrŷrŷhŷkŷ ritxoo, ōwōru ritxoo suritxoo, mana ritxoo. Kia ritxoo heka aōki robiōhyymyhŷre, aō roholaōhyymyhŷre. Rariaōhyymyhŷre. ²¹Iōraru-ribi roxirāhiōtyhy iribi tahe rahōtinynyre aō ōtaōtamy, rubudŷŷnamy, wasinamy, ōwōrumy. Kiale rōhōtinymyhŷrenyre.

10 ¹Tahe iwitxira ŷjuhukŷ rabira biu-ribi suō robehererimy.

Biuwetykywesehekŷle iweroramy rŷireri. Tahe owaji wese iratikile roireri. Iōsŷny tahe txuwewehekŷle, iwaube tasŷ heōtyhykŷwesele roosōmy.

²Tii heka tyyritinadile debō ritŷtenymy ratximyhŷ. Tahe itŷte heka deboube-ki roimyhŷre. Tahe tawaube ruruludu heka betye ritidimy idi rŷire. Tawahyweludu

tasỹ ityti-ò ridemy idi rỹire. ³Tii ryryre heka tarurumy. Leaõ iràhàkỹwesele ryryre. Iu tii rarybereu, debò inatxi reuròmymy heka ramytxynymy dirawyònyde. ⁴Thahe riritinyre heka aõmybo timykira raryberenyre wahe. Thahe rybeò-ò raholare: —Kia widỹyõmy. Kia rybe hewa ierysyna aõkõ rare ixinamy thahe tuu roike. Biritinyõke aõmybo ramytxyna rarybere? ⁵Thahe ýju suki ratxireri, beki ratxireri ruru ludu debò biu-ò riteòsinyre: ⁶—Deuxu-ribi heka tuu raryberé, warybemy inatyhymy. Deuxu heka tiemy rarehyyle rare. Ibutumy heka riwinyre biu-ki rỹira bede-ki rỹira-wana. Tai heka warybe inatyhymy rare. Ararybekre heka raroorehenyõtymy kaki. ⁷Debò inatxi reuròna ýju tajuròna ritxurònykreu heka, Deuxu ibutumy relemy rỹikre iwese rarybere wese. ⁸Iribi thahe rybe biu-ribi wadee nade. Wadee rarybere: —Biòryke hewa tyyrítina ýjudebò-ki naderí suki bera-ki kia rỹireri. ⁹Tai thahe tamy rehemynyreri iòhòmymy tyyrítí tamy rexitòenyre. Thahe wadee rarybere: —Biwyke. Birỹsỹke. Juhuu thahe bidi wesemy ary-ò bidekre. Birỹsỹkreu thahe ibutumy rahyrenykre awo-ki. ¹⁰Iribi rewyrá rerỹsỹra. Iwese tii juhúu rarybera wese rare. Ibreere juhúu. Iribi rerỹsỹreu thahe, wawe rubererenyre. ¹¹Thahe wadee rarybere: —Kai heka dohodỹymy makre ixityre ibutumy inywitxiramy heka botohodỹykre. Ibutumy inywitxira wixira-my botoho. Ibutumy rybewitxira wixira botohomy. Ibutumy iòlòmymy botohodỹykre.

11 ¹Iribi thahe inyò wadee diwahinyde urihixinaõ. Wadee rarybere: —Biurihikesỹ titxibo Deuxusỹ rỹimyhỹre. Iwo tule xiwena wahidỹyna biurihike. Idi mariake tiwesebo iny iwo-ki rỹirémymy. ²Thahe ahana-ki iube idi riraõmyke. Tii dori ityhydỹydukòdu mahàdu dee wahisidỹyna rare. Tiiboho dori 42 ahàdumy idi rariakre. ³Jiarỹ dori inatxi rybedu idi watxiwähãre. Tamy ruru ariwahinykre. Tii heka saumytkyle rariakre. Tii heka rybe ritỹnynykre beòra inataò weeremy. ⁴Rybedu inatxi heka bederaty òwòru inatxi wese rare. Thahe tule inatxi loosòna mynydu wese heka rare. Kia Deuxuko-txi rỹire wese heka rare. ⁵Inyò idi ibinamy riwisỹnykeki, thahe ixirubudỹymy rorukumyhỹre. Heòty iryribihikỹle ròhònyke heka iny rirubunyke. ⁶Tii heka irurudire biu dejuxu lau riekemy. Thahe tiu biu reseòtyhy heka inataò beòra weeremy wahe tii Deuxu rybemy rarybereriu wahe. Ihãre thahe tii rexirahòreke bero nihikỹmy aho nihikỹmy hãlubumy rexirahòreke. Ihãre thahe ibutudee bina riwahinyke, rubuna riwahinyke tiiboho awimy tai raharenykeki. ⁷Kia heka inataò beòra weere rikonananykeu, rybe tỹnydỹydu inatxi rikonananykeu, hãloo rehe nihikỹwo-ribi aõni kòdòhònykreu, thahe aõbina nihikỹ-ki heka iu rỹikre. Thahe inatxi rybedu rirubunykre. ⁸Iumy rubu thahe hãwãry-ki roikre, tibo inyry rirubunyrele. Rawesenanyre, kia hãwã arininikre Sòdòma ada Egito wese. ⁹Inataò txuu weere riwydi hãwã ube-ki iumy rubu roikre. Inyò heka tiu rituunyòtyhy. Ibutu iny hãwã hãwã-ribi ibutu rybe wixira-ribi heka tamy itxeremy rehemynykre. ¹⁰Ibutumy heka iny teysamy rỹikre urile iny widee aõna aõnamy riwahinymyhỹkre. Tiiemy inyò raaõmysỹdỹyõtymy kiatxuu. Tai heka tahòti heka itxi reakre kia inatxi rybedu rurure tahòti itxi reakre. Lisini heka rỹikre, worana bedehesi. ¹¹Kia txu inataò txuweere-di, iumyreny iruna kòdòðsekre tamy Deuxu-ribi. Tiiboho

lamamy rotamanykre. Iny rarokonykre heka ruberu nihikỹmy rỹikre heka.

¹²Inatxi rybedu-ò heka rybetereõ biu-ribi nade: —Kaiboho bòdòibedenyke kaò.

Take biuwetyky raòwònyrenykre kia iòludu mahãdu idi retehemy rỹireri yrubule.

¹³Kiaule take bedede ramytatakre. Debò wiò heto jura jura-ribi heka sohoji resere.

Take 7000 inymy rurure. Take iny rarokonykre take iuhe ruberu nihikỹmy rỹikre. Take wowydyna riwahinykre Deuxu biu-ki ratximyhỹreò.

¹⁴Inatxina bedede dỹynana bina take ròhònyre. Take ijõ kanakre.

¹⁵Debò inatxi reurò ÿjummy heka juròna rurònyre. Take sòwemyhe iny rarybemy rỹimyhỹ, ryrymy rỹimyhỹ: —Kia bedede dỹynana, iòlòna, inynyrỹ hõrõ rare. Kristu hõrõ rare. Aõu aõu tii ibutu ibutu iòlòmy ronykre.

¹⁶Wawiò inaubiòwa matuari take, rynana-ki ronyrenyneri Deuxuko-txi. Take Deuxuko-txi reserenyre. Wowydyna tamy riwahinyrenyre:

¹⁷—Kai Deuxu, tuu tate ihyummy, ibutururu ratyre aruru rare.

Aruruteremy bonykre bedede dinodumy. Umy reàlòmý kia-ò.

¹⁸Iny heka ibutumy alau ruberumyhỹre ibutumy òludumy rỹire, adee deburemy rỹimyhỹre. Rubu hitxidỹyna heka bedede reamy heka roire. Eòdurenyle heka riòwynykre, aijoi riòwynykre, rybedu mahãdu wahe. Ibutumy ani rityhynymy rỹira, nihikỹ iya-wana, kia bedede huduhukỹ rare. Ibededỹynana reamy heka roire.

¹⁹Biuwetyy riraynyre Deuxu heto. Ibutumy heka lobidỹyna tyyriti hyna iwo-ò iny robimy rỹire. Iu take biumytxi, biudelaa ibutu yhynihikỹ, ibutumy bedede ramytatamy rỹire, berahakỹ tule resere.

12 ¹Iribi take ròhònyre warasina-ki aõbo. Aõhebo bedede ritỹnykremy, biuwetyy-ribi hãwyyòmý rabire. Txuu wese take itykyra. Tii lamamy rỹire ahãdu tyre. Tarati tyre-ki take tainahakỹ rataana idi rỹire, waòinatxi taina wahe. ²Tii heka bòtòmý ihỹmyhỹ. Ryrymy heka txubrere rijemy tabededỹynana-ò resera uladu reakremy. ³Iribi take aõna aõna biu-ki rexisỹnymy, aõni hemylalasò nihikỹ wese wahe. Irati take debò inatxi reurò sòwe iratimy. Debòwiò sòwe heka iòmý. Irataana heka iratimyna myna rỹimyhỹre. ⁴Tii take tòhewòru-di taina ributunymy ridyre. Bede tyre-ki idi rehure, taina jurãò. Tii hãwyyko-txi rỹire. Uladu reakreule take uladu riròkremy. ⁵Take tohouã reare, hãbumy heka reare. Tii iòlòmý heka ronykre, ibutu bedede iòlòteremy wahe. Ihãre take Deuxu ridyre. Raòwònyre heka Deuxu rynana-ò. ⁶Hãwyy take rahenyre bederahy-ò. Tii 1260 txumy heka tii bederahy-ki bedede riekremy. Deuxule heka tii riywinyre.

⁷Biu-ki heka aõbina nihikỹ rỹire. Mieli, ÿju dinodu heka, tajjoi-wana raaõbinanyre aõni-wana tajjoi-wana. ⁸Aõni take resera tajjoi-wana. Rõtara. Biu-ribi ròhònykemy take idi ratxireri. ⁹Riteònyre biu-ribi, aõni nihikỹ heka ròhònyra. Tii heka hemylala nihikỹ wese rare. Satanasi inire, Diabo wahe. Itxenadỹydu heka rare ibutumy iny. Suki resera, tajjoi-wana. ¹⁰Raholare take biu-ribi rybeõ-ò: —Deuxu tarasana heka rehemynyrene. Tii taruru riteòsinyre iòlòtyhy raremy. Kristu taruru riteòsinyre. Aõbina bina rybedu take Deuxu-ò rarybehymy ratxireri, txu-wana, ruwana. Tii take ròhònyra

biu-ribi. ¹¹ Waityhydÿÿdu seriðre mahādu heka ròtara Budoeni hālubu-di, inatyhyna hāletena-wana. Rurukemy ratxireri tiiboho tamydeewikeki.

¹² Beysabenyke biu mahādu. Koityhyxe tahe ahohokÿ, bede-wana. Diabo dori adee rehemyre. Tii reburere, ibededÿÿnana dori iðhòmy reare.

¹³ Iu hemylala aōni heka bedekile ratxirerimy rieryreu, tahe hāwyy tohouā-wana kia-ð aōhòkÿmy rotÿÿnykemy risÿnykemy idi ratxireri. ¹⁴ Tahe hāwyy heka nawiihikÿ-ribi idei rihuðtera, tahe idi ruòra bederahy-ð, tasÿ-ð. ¹⁵ Hemylala aōni tahe bee sōwemy tary-ribi rarybexinyre hāwyy ribòròbòròdÿÿkemy. ¹⁶ Tahe aōkøre. Suu tary riraynyre tahe ibutumy bee riðre. ¹⁷ Hemylala aōni tahe reburemy reare hāwyy dee. Ibutumy hāwyy ijoi mahādu rirubunykyky idi ratxireri. Kia mahādu tahe Deuxu bede ywina rityhynyre, iwese Jesuisi tuu ritÿnynyre wese. ¹⁸ Tai hemylala aōni ÿnyrakile rÿire.

13 ¹ Iribi tahe aōnimy rabire berawo-ribi ròhònyre warasina-ki. Tii heka debò inatxi reurò iratimy tahe debò wiò iòmÿ ijòdire. Rataanaò tahe sohoji sohoji ið-ki rÿire. Irati-ki tahe nibinamy heka rÿire. ² Tii heka hāðe wesetyhmy rare. Iwa heka ursowa wesele heka rare. Iry heka hāðery wese rare. Aōni heka tamy ruru sōwemy riwahinyre, irynana wahe. ³ Iribi heka rabire iratið, sohoji heka wotòmonahakÿ dire. Tahe reytereri. Ibutumy iny riðtiinyre. Aōni riheludunyre. ⁴ Aōni hemylala heka taruru riwahinyre aōni-ð. Tai tahe ibutmy iny heka aōni riwowydnyre. Iny rarybere: —Mobo heka aōni wese rare? Mobo ijesedukre? ⁵ Aōni heka aōbina bina rarybere. Inyð ribyrenyðtyhy. Ahādu 42 tii heka kiawesemy rÿikre. ⁶ Tii Deuxu dee heka aōbinamy rarybere, Deuxusÿ dee, ibutumy biuludu mahādu tule rybebina-di ribinabinadÿÿnyre. ⁷ Inyð tamy ruru sōwemy riwahinyre Deuxu ijoi mahādu-wana raaōbinadÿÿkemy. Tuu rahaÿnanykemy heka ibutumy iny wixira wixira, ibutumy rybe wixira mahādu, ibutumy bede bede mahādu. ⁸ Ibutumy iny ityhydÿÿdukòdu mahādu tamy wowydyna riwahinyke. Budoeni Riðre ijoi mahādu tahe aōkøre, kia dori ini rÿirenyre tyyriti-ki. Juhu bededÿÿnana inireny iwo-ki roire. ⁹ Tahe inyð roholakeki heka, boholake. ¹⁰ Inyð ridyke. Riròtenyke ròtenawo-ki. Ijò tahe rirubunyke. Deuxu ijoi mahādu tahe rexityhynyre idi òbitimy roirenyrekremy. Kie.

¹¹ Tahe ijò aōnimy rabira. Tii ròtuðreri bede-ribi. Iò heka inatxire. Budoeni wese heka rare. Ihāre tahe aōni wesele rarybere. ¹² Tii juhu aōni wese rare, iruru. Rarybere: —Juhuludu aōni biwowydnyke. Kia ratiwotomona-di. ¹³ Budoeni aōni heka aōna aōna wiwihikÿmy riwinyre. Tii heðty biu-ribi resekemy tii rotÿÿnyre. Ibutumy iny tuu robire. ¹⁴ Tii ibutumy iny riitxenanyre kia aōna aōna wiwihikÿ òraruki. Iny ibutu-ð rarybere: —Suritxooð nihikÿ biwinyke aōni dee. Tii mayrehe-di rawotòmore hārele ruruðre. ¹⁵ Tahe ihewoludu aōni heka rabunyra suritxoo-ð tahe irumy rÿire. Idi suritxoo rarybere. Inyð tamy wowydyna riwahinykeki, tii tahe rirubunyre. ¹⁶ Tii rarybera ibutumy iny-ð: —Kaiboho waritina bitidike aòru-txi, eboreny-txi, ruruweludu wahe. ¹⁷ Aōkòkeki tahe aòhoho aōkò riwyke. Iny kia ritina ijòdiðkeki aòhoho aōkò rohonykre.

¹⁸Kai erydỹna sōwekekile, aōhebo tatỹnytemy kaiboho bierybenykre. Kai erydỹnadikeki, aōni heka rieryke. Ini heka iritina rarōsōna wese rare 666 ihỹre.

14 ¹Idi tahe budoenimy rabire lamamy nyidemy Jerusalē hāwā-ki. Aōma Siaō hāwālōkile rỹiremy. Tii-wana heka rỹire 144.000 kia inymy heka tii-wana rỹire. Ibutumy tiiboho heka tybynimy, inymy heka ibutumy iōru-ki raritiny my rỹire ibutu ōru-ki. Tahe tuu rabire rasinaōmy. ²Biuwodỹy nihikỹmy raholare, tule biuwodỹy hỹkỹ ada benihikỹ lesetere wese iwodỹy rare. Tahe sōwemy iny rawiunymy rare violaō-wana, kia wodỹy wesehekỹle wahe. ³Kia heka wiu tỹmyra riryrymy rōirenyre kia iny tỹmyra rirahura mahādu. Kia Deuxu rynana nihikỹko-txi heka rotỹmnyrenyra. Kia inaubiōwa aōnityhy heka waitue inaubiōwa matuarimy tahe ijōmy rỹire. Tahe 144.000 kia inyle heka rawiunykeki, awimy rỹike. Tii dori aōma tarasadumy ratximyhỹrenyre. ⁴Tiiboho heka tyra roire, tiiboho heka ōbiti roire iwese ijadōma ratxirerimy ihỹre wese ōtadu mahādu aōkōhyre. Tahe budoeni riōrehemy heka rare titxibo tii rare hemy. Tii dori wydynamy rare. Kia hābuy-ribi. Bede ywisidỹna juradỹna kia dinodumy heka rare. Deuxu heka Budoeni Riōre-wana wahidỹnamy heka roiremy. ⁵Tiiboho heka raryberenyōtyhy tiiboho ruidu roiremy. Ōbiti heka tiiboho roire. Tiiboho heka rahitxirenyre Deuxu dee.

⁶Tasỹ ijōmy rabire jỹuōmy aōma biuwetyky kiako-txi raramy ruōmy rabirerimy. Tii heka Rybewihikỹ tỹmyra rimymy idi rara aō inywitxira-ō ritỹnynykremy. Ibutu bede bede inywitxira-ō ritỹnynykremy. Ibutu rybe-di ritỹnynykremy, Rybewihikỹ tỹmyra wahe. ⁷Kiamy heka ryryre: —Deuxu bityhynyke. Marybebenyke tii awi raremy nihikỹ raremy. Bededỹnana rehemynymy roire ihitxidỹydu bede-ō. Bityhynybenyke tii dori bede ibutumy riwinyre bee, biu ibutumy riwinyre.

⁸Tahe jỹuō heka ihewomy ruōmy ratximyhỹre. Babilonia hāwā nihikỹ rexihura. Ibutu iny dori ōraruna-txi resera. Kia hāwā mahādu dori ibutumy iōrarudỹnyra.

⁹Iribi tasỹ iwitxira jỹusỹ tamy nade iheto-ō. Tii tahe ryrymy nade: —Inyō aōnimy ada iritxoomy rityhynykeki, iribi riwykeki iwotōmona iōru-ribi tebō-ribi riwykeki iritidỹna, tii tahe Deuxu ykarana heka iribi riwykre. ¹⁰⁻¹¹Tiiboho heka aōhōkỹmy rotỹnyrenykre jỹuko-txi. Budoeni Riōreko-txi aōhōkỹmy rotỹnyrenykre. Heōty kia bede dỹnana tyhy tiemy raōwōnyhy rarakre. Tiiboho dori tiemy aōnityhy nihikỹle, iritxoo-wana rityhynymyhỹrenykeki, tiiboho heka iritidỹnale ixi-ki riwmyhỹrenyre. ¹²Tai tahe ibutumy iDeuxuhe ywina-dī heka iwitxira iny ronykemy heka ratximyhỹre. Ibutu aō ōta ibina bina biōludunybnykemy, tiiboho dori aijoi ōbitihyy boibekemy ikonana-ō. Jesuisi bityhynykemy.

¹³Iribi tasỹ ixityre ijō rybe-ō raholare watyre-ki. Rarybere: —Kiahe biritinyke: Aō rorehemy aōkō heka dehemynymy deade. Kia Jesuisi-ō rurure heka uriōno heka tamy dehemynymy deade. Iribi tahe tule rarybere: atytyby reysamy ratxireri. Myle. Tahe rexielehynymy heka rorukumyhỹrenyre aōhōkỹmy dỹnana-ribi. Tii dori aōwiwhikỹle riwinyrerimy ihỹre. Reeryre heka.

¹⁴Idi tahe iwitxiramy aomybo rabire wiribi hitxiramy. Nonoe wetyky urahakyle wese heka rare. Inyõ ityre-ki ronymyhÿ. Hãbuõ wesehekylemy heka rare. Irataanadikhikylemy ronony heka tarati-ki heka idi ronymyhÿ. Womati tÿrÿrÿhÿkyle wesehekyle irataana rare. Tahe ijõ heka itieresynaõ-di heka tebõkihikyle heka rÿire. ¹⁵Ijõ heka Deususÿ-ribi nade, ÿjuõ. Tamyhe rryre: —Bexitÿmyranyke, itieresyna-di tasÿ bexitÿmyranykre. Bededÿÿnana rehemynomy roire adee aõ biõrõrõkemy. ¹⁶Tahe kia nonoe wetyky tyre-ki ronyreri tahe rexidelenyre riõrõrerihe. Riwyrehe ibutumyhe aõna aõna riwyre tahe ributunyre.

¹⁷Kia ijõ Deususÿ-ki ratxireri tasÿ tule debõnadimy ratximyhÿ kia tieresynadile ratxireri. ¹⁸⁻¹⁹Kia ÿju aõma heõty kia loo-di ratxireri tahe dyryde heka tieresynadile tamy rehemynykemy. Tieresynadile biorobeke idi atxibeke. Ibutumyhe bede bede kia biorobeke. Ceifale dori biorobeke. Rubumy dori rÿire hitxidÿÿna-õ. Iribi tahe reare. Tiõ tiõ idi reamy tahyna-õ rabutumy reare kia Deuxu ykarana-õ. ²⁰Tai tahe bederatyhe risorunyrenyre hãwã-ribi hitximy. Sõwemy hãlubu rõhõnyre. Kia urihixina heka sohoji metro weere heka rare. Irehere heka bero wese 300 quilometros irehemy. Awarulomy heka rabeheõmy roire ibero.

15 ¹Ijõ aõna aõnamy rabire biu-ki ihewo-ribi riteõsinyreri. Debõ inatxi reurõmy ÿjumy heka rimyra kaa aõmysÿdÿÿna. Kidiwydenykre heka debõ inatxi reurõ aõhõkÿmy dÿÿnanamy. Idi tahe Deuxu ykaranamy rexikonanamyhe roikre.

²Iribi tahe bero nihikÿmy rabire wako-txi aõma heõty wese, womati tÿrÿrÿ wese. Sõwemy heka inomy rabire kia sutyre-ki nyidemy bero iõhõmy. Ibutumy heka aõni debure deburehekÿ kia rubu-ribi ritamy nyide. Iu heka aõni tai roiõhykyre heka, aritidÿÿna roiõhykyre heka. Tahe aõma aõnimy rahaÿnanyrenomy ratximyhÿre iritxoomy tule violaõ oworuwodÿkÿhe tai rÿire, Deuxu rawiunyrenyleri riryryreri. ³Moisesi Inynyrÿ deõdu wiu riryrynyreri. Tule Budoeni Riõre wiu riryrynyrenyleri. Kiamy heka rare: —Oi Deuxu, Kai heka aruru-di tate. Aõni tewinymahãte. Ibutu tarasana tewinymahãte. Ibutu heka ary õbiti rare. Awi heka rare. Kai heka ibutu iõlõ tate. ⁴Iõlõhyky tanamahãte. Tiiemy heka rityhynomy hyky hyky tanamahãte Inynyrÿbohomy. Wowodyna heka adee riwahinymahãke. Kai sohojile heka õbitityhymy atximahãte. Ibutu bede bede ludu heka anatyhynykremy kedeadeakre. Ibutumy aõbo tewinyte. Ibutumy bede õbitidÿÿnymahãte heka rieryre.

⁵Kia bedeõ heka Deuxu hetomy roimyhÿre ierykõnamy roimyhÿre. Iwõte ierykõna. Tii heka riraynyrenyre heka kia bede. ⁶Kia debõ inatxi reurõ kia ÿjuhe rõhõnyre Deuxu heto-ribi. Diwydehe debõ inatxi reurõ aõhõkÿmy dÿÿnana. Aõma itykyrenyre, linho urahakÿ itykyrenyre. Irawo-di ibreti wereysanamy tahe womati tÿrÿrÿhÿkÿ reare. ⁷Sohoji aõniõ aõma Deuxu ykarana hyna sohoji sohoji-õ tamy diwahinyde. ⁸Deuxu hetowo heka aõma wãdãhãkÿlemy reare. Loosõna dori iruru

dori sōwemy r̄yimyh̄y. Tai heka urile roosòhòk̄ymy rat̄yr̄r̄ȳh̄k̄ymy. Inyō heka iròteōna. Debò inatxi reurò ÿjumu. Kia ritxiwimy rexihudile tahe iny ralòke.

16 ¹Deuxu hetowo-ribi ijōmy raholare rybetereō-ò. Rarybereri ÿju mahādu-ò: Boibenyeke hewa abede-ò. Debò inatxi reurò hyna bitxiwibenyeke kia Deuxu ykarana hynamy. Tahe ÿjumu dòhònymy deade tahyna-di ditxiwide bede-ò.

²Iribi tahe rexidelenymy reare aōma juhū ÿju ihyna ritxiwire bede-ò. ÿju binahak̄ymy ròhònyre ibutu inymyhe rob̄ȳt̄ȳmy reare. Kia aōma aōni kia ritina idru-ki r̄yirele k̄nyhe tuu r̄yximy. Tule suritxoo rityhynymyh̄rele kia mahādule heka yjy yjy ròhònyre.

³Tahe ihewoludu heka tahyna-di dòhònymy deade. Betyre ritxiwire. Bee hālubu huk̄ȳlemy reare. Ibutumy bera-ki raremyh̄re ituere.

⁴Juhu ludu hewoludu tahe ritxiwire berohok̄y tyre heka ritxiwire. Bee ibutumy bewydysyna rihòrōnyre. Ibutumy hālubu huk̄ȳlemy relere. ⁵Tahe ÿju rybe raholare aōhebo bera-ki rot̄ȳnyrerid: —Kai Deuxu, Kai awi tate. Kai òbiti tate. Tuhyy ahāte ihāre tahe tuhyy ahāte. ⁶Rybe t̄nyd̄ȳdu mahādu heka ituere, rurure. Deuxu ijoi hālubu ritxiwire suò. Katahe rubud̄ȳdu kaihe id̄wyd̄ȳdukre. Hālubu tetxiwiteriki tule id̄wyd̄ȳdukre. ⁷Tahe raholare ijò ÿju rarybereri-ò, Xiwena-ribi heka ròhònymy: —Kia InyDeuxu heka ibutumy ruru dire. Ibutumy tewinyte òbitimy awimy.

⁸Tahe ihewotyhy konana ludu tahe ritxiwire hyna txutyre-ki. Tahe txuu ratòteenyrene itòtee nihik̄ȳmy relere. Sōwemy heka iny risòre bedetòtee. ⁹Tai tahe rirajuamyh̄re Deuxu nibinahak̄ymy rirajuarerimy ih̄ȳre Deuxu dori diteònyde heka beded̄ȳnana binahak̄y. Tahe inyò heka tòhòti rawitxiranyòhyre iraykywydyna. Kiamy ixiwesehy ròhòtinyinre. Kia iny heka aōhe rot̄ȳnyòhyre wowydyna loosònabo.

¹⁰Iwitxira ÿju tahe aōma ritxiwire tahyna aōni ryna tyre. Kia heka aōni beludu rare. Tarynana tyre ronymyh̄y. Tahe ibutu irynanareny torohok̄ȳlemy reare. Ibutu iòlòna torohok̄ȳlemy reare. Tahe tòròtò-ki ruruare taaòh̄k̄ȳh̄k̄ȳnareny-di. ¹¹Tiiboho heka Deuxu nibinahak̄ymy ryryre webinadumy roireki taaòh̄k̄ȳh̄k̄ȳnareny-di. Timy heka rexinohòtilosanyòhyymyh̄re aōbina binahak̄y riwinymy roiremyh̄y-ribi.

¹²Tahe iwitxira ÿju tahyna ditxiwide. Eufratesi berohok̄y tyre ritxiwire. Tahe ibutumy heka rūȳre. Oriente iòlò mahādu dee tahe ryy kia riraynyre. ¹³Tuu rabire heka inatao tyytyby binahak̄y. Rexitykynyre òrò tykyhyk̄y wese rexitykynyre. Aōni heka hemylala aōni inire tahe iry-ribi rexioòlòd̄ȳnyre. Tule aōnibina witxirary-ribi, tule aōni rybedubina-ribi. ¹⁴Iribi heka aōni bina tyytyby kia tyytyby ibutumy heka bede dinodu iòlò ributumy. Raaòbinanykemy heka dirahude Deuxu kia mahādu-ò. Deuxu ihitxid̄ȳnatxumy r̄yikemy heka anade tii dori ibutu ratyre aōna aōna-ki. ¹⁵Kristu rarybere: —Tahe boholabenyeke. Aōwesele heka anakre. Wasidu wesemy heka adehemynymy adeakre. Ibutumy iny wararòsòdu mahādu teysamy r̄yikre. Atyky heka biywinymahābenyeke tai timyki

maix̄rubenyōtyhy adhemynykreu. ¹⁶Kristu rarybere: —Ibutumy heka widotyde aōbinakedu Mikidu hāwā-ki wahe. Hebreu rybe-ki tahe Armagedom inire.

¹⁷Tai tahe ikonanatyhy ŷju tahyna ritxiwire yhykile. Tahe raholare biumytxihik̄y raholare Deusus̄-ki. Deuxu rynana-ribi dōhōnyde: —Ibutumyhe rakonanamy roire. ¹⁸Tahe biumytxihik̄yle ibutumy rawodŷnyre. Tule biu relaanyra. Biu ramytataōmyh̄yre idi tahe ramytatare. Tii heka lahityhy rare. ¹⁹Tai tahe Babilonia hāwā rabōhōre inataō jura juramyh̄my. Ibutumy hāwā nihik̄y-ribi hetohok̄y rejuxunyre. Tai tahe kia Babilonia kia òraru-txi tahe Deuxu tōhōti reare. Tai tahe aōhōk̄my risŷnymy h̄y ibutumy aōbede binahak̄y tamy riwahinyre. ²⁰Bedebute ibutumy rexiwore. Iribi tahe hāwālō tytyhyk̄ylemy reare bedero wesehek̄yle. ²¹Idi inytyre resemyh̄yre bera ere erewesele resererimy ih̄yre. Ijō iutxie tahe 40 quilo bede heka iutxie rare. Kia tahe iny sumy r̄yre nibinahak̄my Deuxumy rarybemy.

17 ¹Tahe ŷju monahyna-ki wadee rybemy nade: —Adee aritŷnynykre aōbo Hāwā Bero sōwe aōhebo rotŷnykré heka. Kia hāwā adee ariteòsinykre timybo rare. Wedena wese aōhōk̄my rotŷnykremy. Deuxu heka aōhōk̄my dŷynana riwahinyke kia hāwā-ò. ²Bede iòlō dinodu tamyhe iòraruna tamy rexiòrarunyre. Tule iny bedemy r̄yra mahādu ralōre tamy òtaòtamy. ³Tai ta kia ŷju tamy riwadyre bederahy-ò. Deuxu Tyytyby wadee dobehede? (Riwatyytamy watyytyby heka ridyre). Tai tahe tuu rabire heka hāwyyumy aōma iròdutyre-ki ronyrerimy. Iròdu heka isòhōk̄ylemy roire. Debò inatxi reurò irati r̄yre, tahe iò debò ituemy sōwe. Iritina heka aōkōre rarŷnymy h̄yre. Deuxudee heka aōbina binahak̄ylemy tai iritidŷyna r̄ymy h̄yre. ⁴Hāwyy heka isòhōk̄y ityky rare, iwihik̄y rare. Ityky tyre heka womati tŷr̄yh̄k̄y roire. Mana r̄ys̄y wiwihik̄y, woumana-wana. Bemona debò-ki idi rare. Iwo-ki tahe bemonawo-ki tahe aōna bina nibina tai roire. ⁵Tai tas̄y iòru-ki tule r̄yre iniō. Aōbo rare tahe iny rieryōtyhy. Babilonia Nihik̄y rare. Ibutu wedenase tii rare. Ibutu inybinase tii rare. Kia luunadu ibutumy bede bede-ki. ⁶Iribi tahe rabire hāwyy ixityre. Tii iny hālubu riōre. Ityhydŷydu mahādu hālubu-di rexiòdewàrinymy heka rare. Tiiboho rurure, òbitimy Jesusimy rityhynyreki wahe. Kia hāwyyumy tahe rabireu, rexiòtiidŷnyre. ⁷Tai tahe ŷju wadee rarybera: —Aòherekibo bede teòtiinymy tŷite. Adee arelyykre aōbo rare — kia hāwyy iròdu-wana, aritŷnynykre tiiboho aōbo raré. ⁸Iròdu tuu tabita, irumy rare tahe rurukre ele emy. Tii hāloorehehek̄y-ribi kòdòhònykre. Iribi tahe rexihukre. Tii rurure idi ixby dòsede. Bede iny mahādu bede riòtiinykre idi heka iròdu debure binamy robirenykreu, bede riòtiinykre idi. Tiiboho dori ini ihoōre iru tyyritiwo-ki. Tai tahe iròdu deburebina lau ruberure. Iròdu dori ihetxiu irumy rare tahe wiji aōkōre. Idi tii irumy kanankre ixbyyle. ⁹Kia ibutumy adee aritŷnynykre: Debò inataō rati tahe iròdule rare. Kia hāwyy ityre ronyre kia hāwālō wesere. Iròdu rati tule iòlō mahāduò rare, debò inatxi reurò sōwe. ¹⁰Iruyre iòlōò tahe reserenyre. Sohoji iòlō tahe ratximy h̄yre.

Ihewotyhy ikonanaludu tahe, kanakre wijina. Tai ibededỹynana iòhòlere. ¹¹Iòlò debòinatao ludu tahe iròdu rare — kia irумы juhuu rare tahe wiji rurумы rare wahe — tii juhuuu iòlò mahāduo rare. Tii tule ituekre. ¹²Debò itue òmy tuu tabitamý wahe tule iòlò mahādu rare. Tiiboho kanakre iòlòwesemy. Iròdu-wana tiiboho hāwā wedumý ronyrenýkre iròdu aōni-wana sohoji horamý. Tii tyytyby bina rare. ¹³Tyyritiō riwinykre idi tahe ibutumý ruruna iròdu bina-ò riwahinykre. ¹⁴Raaōbinanyrenýkremý heka Budoeni Riðre-wana. Tahe Budoeni Riðre aōbina-ki haỹnadukre. Tahe ýju wadee rarybere: —Tii dori butu iòlò, ibutu iòlòna ratximyhýre. Ibutu inynyrý ratximyhýre. Ijoi heka kia ywymý tii-wana roire itarasaō-ki. Kia rityhynýkremý rýrerimý ihýre. ¹⁵Tahe kia ahohoký, berohoký tai kia hāwymý ronýmýhýré. Tiiboho iny rare ibutu rybe-ribi, bede-ribi wahe. ¹⁶Debòwiò òmy tuu tabita iròdu-wana heka hāwymý derarenýre. Tii irurawonykre. Tii heka heòty-ò risōmý, riròrenýkre wiò wiò. Ityky iribi ritara idi. ¹⁷Ibutumý inywese rare. Bede bede iny ibutumý rybe òta òta rarybemýhýre. Tahe Deuxu heka riwahinyre aōbo ixideewimý riwinykremý. Tai tahe aōwaxiny aō tamywi heka riwinykre. Tai tahe ibutumý iròdu sòhòký taru riwahinykre, Deuxu Rybemýna bede rýidi. ¹⁸Hāwāhāký nihiký tabite heka wedena wesemy roire. Kia Hāwāhāký heka ibutu wedu iòlò rare.

18 ¹Tai tahe ijōmý rabire ýjumý rabire biu-ribi ròhònyrerí. Tii sōwemy iruru rare. Tii sōwemy iloosōna rare. Ibutumý bede ritoosònyre. ²⁻³Ta rryryre tarurumý tii rryryre: —Babilonia nihiký resera! Resera! Katahe aōma wedumý, bede bede iòlò heka tii-wana òta riwinyre. Ibutu iny-ò tamona riwahinyre iòtaòta boho boho. Nawii witxira witxira ibinahaký tai rasýnymyhýre, tyytybybina-wana. Ijohodu mahādu idi nieru sōwemy ributumýre. Idi rexityhynýre.

⁴Iribi tahe raholare ixityre rybeō biu-ribi rarerí. Manake hewa, Bòdòhònyke wa kia hāwymý-ribi. Kai heka wajoi toite. Tii-wana bexiòrarunýbenýkemy aōkō! Bexiòrarunýbenýkeki tii-wana, tai tii-wana aòhòkýmý botýýnykre. ⁵Tii heka iòraru sōwe nihikýmý ratximyhýre. Deuxu heka aòhòkýmý dýýnana tamý riywinýmý ratximyhýre iòraru-ki. ⁶Biwinýmýhýre heka iwese tii riwinýmýhýre wese. Aō ibinamý ibinatyhymý tamý relekre. ⁷Aō ibinamý ròhònyke inatxi bededỹýnanamý tamý ròhònykre. Ibutumý aōbo tamýwymý idi raremýhý heka riwinýmýhý ixideewimý. Katahe iwese aòhòkýmý rotýýnykre tahe rabadewokre. Hāwymý tahe ixidee rarybere: —Jikarý ikòlò rare. Wytese anokō jikarý rare. Tiku heka rabadewokótyhy anohòkýmý ratýkýnykótyhy. ⁸Tai taheka aōwesele heka tamý bedeòtiidýýdu kedehemýnymý bedeakre: rubu, aòdese, rama uritereribile tamý kedehemýnykre. Heòty ibutumý ritoonykre. Deuxu urihixina-di dehuu ratximyhýre. Tii ruru-di ratximyhýre. ⁹Kia bede dinodu mahādu rahinykre itòdenamý. Tii-wana dori òta òta riwinyrenýra. Tiiboho robikre wàdà iribi ròhònyrerìò wahe. ¹⁰Irehemy iribi rýire. Ruberureri iaòhòkýmý dýýnana lau. Tahe raryberenyre: —Babilonia hāwā, kai hāwā nihiký rare. Tahe wiji ituera atximahāte. Kobelàhàxe. ¹¹Ibutumý aōna-ribi

ijohodu rahinykre itòenamy. Inyõ dorihe iaõ tamy riwydyõmy tamy ijohonamy aõkõ. ¹²Juhuu heka raaõbradyõmy aõma iny mahãdu ratyre. Womati tÿrÿrÿ riõbranyõre. Tule woumana riwyrerimy ihÿre juhuu. Tykysòwihikÿ wixira wixira heka riwyrerimy ihÿre. Tule òwòrulÿnyre, iròdu nohõmy riwinyrerimy ihÿre. Bede ritxoo ibutumy aõna iòwyhykÿre. Womati òta òta wiwihikÿ riwyrerimy ihÿre. ¹³Aõma rÿsÿna uri wiwihikÿ tule aderõna wiwihikÿ, tule vÿi riwyre, paõ widÿÿna, adÿÿ-wana riwyrerimy ihÿre. Tule maixõmo, broreni, budoeni, awaru, tewe, ityti heòty, tule iny deòdu iòwydimy. ¹⁴Tahe ijohodu mahãdu rarybere hãwã-ò: —Ibutumy aõna aõna wiwihikÿ ituera, kia kaiboho riwyrerimy ihÿre. Tiu ixityre aõna aõna riwyõtyhy, ixãwira. ¹⁵Tahe aõna-di ijohodu mahãdu rabadewokre, rahinykre tiiboho dori iòraru-ki raityhyntyreny. Irehe-ribi retehere. Ruberurennyre. Ryryreri: ¹⁶—Kobelãhãxe hãwã wihikÿ. Ibutumy atykysò ituera, awomati wiwihikÿ ituera, woumana, manawiwihikÿ ibutumy ixãwire. ¹⁷Sohoji òraule ibutumy iaõna aõna ixãwira. Ibutumy hãwòhòkÿ dinodu urile, iwìòhenadyõdu mahãdu tule suludu mahãdu retehereri irehe-ribi. Tii dori nieru ritamyhÿre iaõna-di. ¹⁸Iu hãwã wãdàsimo robirenyreu tahe, ryryre: —Kia hãwã wihikÿ rare. Ijõ hãwã iwese ihoõhyre. ¹⁹Tahe brybysi ityreneny rehurerimy ihÿre. Rahinyreri, ryryreri: —Bobrekÿ, bobrekÿ hãwã wihikÿ. Aõwesele heka ixãwira. Ibutumy ityhy mahãdu, iaõna rexihura. ²⁰Tahe kaiboho beysabenyke biu ludu mahãdu. Hãwã nihikÿ dori ituera. Deuxu hõrõ mahãdu, Deuxu deòdÿÿna mahãdu, Deuxu dee rybedu mahãdu ibutumy beysabenyke. Deuxu dori iaõhòkÿmy dÿÿnana tamy riwahinyre aõrauru-ki.

²¹Tahe ÿju nihikÿ heka manaõ rimyre, mana nihikÿõ, iwese maixõmosyna mana wese wahe. Idi rehure ahobero-ki rehure. Tahe ryryre: Kiawese heka Babilonia hãwã-di arehukemy watxireri waruru-di. Ixãwikre. ²²Tahe wiu wodÿÿ kia hãwã-ki roholaõtyhyke, harpa wodÿÿ aõkõ, flauta wodÿÿ aõkõ, jurõna wodÿÿ aõkõ. Aaõmysÿdÿÿdu aõkõ kia hãwã-ki raaõmysÿdÿÿõtyhy. Mai rÿÿna, manasya iny heka iwodÿÿ roholaõtyhy. ²³Loosõna ay-ki ritoosònyõtyhy. Herina mahãdu rybe ay-ki iny roholaõtyhy. Iaõna ijohodu mahãdu ibutu hãwã-ribi ityhy rare. Tule ibutumy iny riitxenanyre aõtaõta-di, bede bede iny wahe. ²⁴Babilonia hãwã heka aõhòkÿmy dÿÿnana rotÿÿnyre. Deuxu rybedu mahãdu hãlubu dori kai tetata tule Deuxu hõrõ mahãdu. Rirubunyre mahãdu wahe.

19 ¹Iribi tahe ijoi nihikÿmy roholare. Ryrymy heka rÿimyhÿ sòwemy iny rÿimyhÿ biu-ki. Deuxu deysanamy heka ryryreri: —Wowydynamy Inynyrÿ-ò. Tarasana dori inyDeuxu-ribi rare. Wowydyna, ruruna ibutumy ihõrõle rare. Aõbo tii riwinyré, òbiti rare. ²Aõhòkÿmy dÿÿnana òbiti rare. Aõhòkÿmy rotÿÿnyre heka kia aderana-ki heka rare. Tii aõhòkÿmy dÿÿnana ritare. Bede iny heka riòrarudÿÿnyre. Tahe Deuxu riòwinyre teòdu rubudÿÿna heka riòwinyre. ³Ixityre ijoi ryrynyre, rawiunyre: —Wowydyna Inynyrÿ-ò. Wãdã raòwònyreri tai rawòsi-ribi. Ihymy raòwònykre, hãwã nihikÿ-ribi wahe. ⁴Tahe ibutumy rejuxunyre Deuxu luukemy. Wawiò inaubiòwa matuari rare. Tule inaubiòwa aõni rare. Deuxu tahe rynana nihikÿ-ki ronyre. Tamy rirajuare: —Kia, Kia,

wowydyna deysana Deuxu-ò. ⁵Iribi heka ròhònyre Deuxu rynana nihikỹ-ribi heka rybeunimy ròhònyre: —Biwowodynybenyke Deuxu-ò ibutumy deòdu mahādu, ibutumy iny rityhynymyhỹre mahādu, iyja ta nihikỹ-wana. ⁶Tahe ixityre ijoi-ò raholare. Ryrymy rỹimyhỹre. Tahe benihikỹlesetere wese heka iwodỹỹ rỹireri, biumytxi wesehekỹle heka iwodỹỹ rỹireri: —Wowydyna Inynryỹ-ò biwahinyke. Tii iruru dire. Tii heka iòlò rare. ⁷Ibutumy iny rekeysarenkye. Tamy wowydyna rikiwahinyrenkye. Tii dori inihikỹre. Iòhòra dori kia Budoeni Riòre kia hāwyyimy herina kia bededỹynana-ò. Worana bedehesi kỹnyikre. Ihāwyy heka rexiywinyimy ratxireri. ⁸Tyyurahakỹle-di rexiyyynyke. Awityhymy ityy doimyhỹde wahe. Deuxu dee awihikỹ widỹyna wese heka kia ratxireri. ⁹Kiamy heka ýju wadee rarybere: —Kia biritinyke. Ibutumy lobidỹyna mahādu reysamy ratxireri. Ýju wadee rarybere ijò: —Kia heka Deuxule tuu rarybere. Inatyhy rare! ¹⁰Tahe jiarỹ resere ýjuko-txi ariwowodynykemy. Tahe tii wadee rarybere: —Kia widỹỹomyke hewa. Jiarỹ tule Deuxu deòdule heka jiarỹ rare, awesele wahe. Aityhydỹydu seriòre tule awesele rare. Rarybemyhỹre dori Jesuisi tyhydỹynamy. Deuxule biwowodynyke! Ibutumy Jesuisi relyyre heka tuu rybedu mahādu ritỹnyre.

¹¹Iribi tahe tuu rabire awaruurahakỹò biuwetyky-ki. Inyò ityre-ki ronymyhỹ. Ini heka Òbiti rare, Inatyhy rare. Tii heka aòbinanymyhỹle rare. ¹²Iruwe heka heòty wesele rare. Irati heka sòwemy raheto rỹire. Iò-ribi heka nii roire, ini wahe. Urile inyò rieryòtyhy mobo ini rare, tyriti wixira dori tiile heka rierye. ¹³Ihety heka hālubuhukỹle-di ityre rare. Deuxu Rybe heka inire, hābu wahe. ¹⁴Sòwemy iny heka awarutyre-ki rỹire, biu-ribi dòidenyde Deuxu Rybe hewomy, soldado wese wahe. Iny ibutumy ityyura-di rexiyyynyre, ityratyhy wahe. ¹⁵Tii heka mayrehe rabuhukỹle iry-ribi ròhònyrerimy ihỹre. Idi tii heka iny rirubunykye ibutu bede bede-ò. Iribi tahe tii ròhònyre iòlòtyhy tii rare. Aòhòkỹmy dỹynana tamy riwahinyre, ibinatyhymy heka riwahinyre, Deuxu iwona, Deuxu ruruweddu wahe. ¹⁶Ihety-ki heka iti-ki rỹire iniò: Iòlò iòlò wedu tii rare, ibutu wedu wahe.

¹⁷Iribi tahe ýjummy rabire, txu-ki rỹire. Nawii ibutu-ò ryrymyhỹ: —Bòdòibedenyke heka, Deuxu worana bedehesina-ò bòdòike rỹsýna birỹsýbenykye. ¹⁸Aòmade biròbenyke, iòlòde, soldadu wedude, iawarude, ibutumy inyde biròbenyke, ixihy mahādu, deòdu mahādu, nihikỹ iyja-wana.

¹⁹Iribi heka tuu rabire aòni binahakỹ, iòlò mahādu, tasoldado mahādu wana. Wii ributunyre aòbinamy. Awaru tyre-ki ronyrerimy kia mahādu-wana tiiboho raaòbinanykemy. ²⁰Tahe aòni bina rimyrenyre, rybedu bina-wana. Teròwymy tii aòna aòna wixirawi riwinyre. Iribi ridyrenyre heka heòtyaho-txi idi rehurenkye, enxofre-di riworonyre wahe. ²¹Ibutumy isoldado heka ituemy rỹimyhỹre rurumy. Mayrehe-di rurumyhỹre, kia awaru ura tyre-ki ratxireri kia ryribi ròhònyreri kia-di rurure. Tahe rararesa deadeade ide riròkemy.

20 ¹Iribi tahe ýju nademy biu-ribi. Irayna heka debò-ki idi rỹire. Hāloonihikỹ rayna wahe. Tule womati rerotihikỹle iruty-ki roire. ²Kia aòni rimyre, Diabo wahe, Satanasi wahe. Inyò tule hemylala raninire. Tahe 1000 beòra riekre ritaataare womati reroti-di. ³Idi heka rehure hāloo

nihikỹ-ò tahe riratòbònyre, rirarytxynyre. Tai tahe tii riitxenanyõtyhy bedede iny. Kia 1000 beòramy bedede reakreule, tahe rexihumy iròtèna. Urihimyò bededỹnana bedede riijekre, ixihyyle tai ixybyle ròbòdỹykre.

⁴Iribi tahe rynana sòwemy rabire. Iny ityre ronyreri mahādu ywisidỹydu mahādu heka rare. Iribi heka tuu rabire Jesuisi dee rurure mahādu. Inatyhyna rybe tỹnydỹy òraru-ki heka rurure. Aõni rityhinyõre, iritxoo rityhinyõre, iritina òraru iòru-ki ritidiõtyhy, deboreny-ki ritidiõtyhy. Rubu-ribi tiiboho rexixarenyre. Kristu-wana ratxireri 1000 beòramy. ⁵Kia heka juhuludu ixixana heka rare. Ijõ rubu mahādu heka wiji rexixaõkre. Tahe 1000 beòramy reareu, tahe rexixarenykre. ⁶Juhuludu ixixana mahādu heka reysatyhymy rarekre. Ixyby rubunamy heka ruuõkre, inatxina rubunamy wahe. Deuxu dee, Kristu dee heka tiiboho Xiwena wahidỹydu roirekre. Tii-wana 1000 beòramy riwrenykre, iòlò mahādu wesemy heka ratxirenykre.

⁷Kia 1000 beòra reareu heka Satanasi ixihyummy ròhònykre bedede-ki. ⁸Tii itxenadỹydu ròhònykre ibutu iny riitxenanykremy. Kia Kòke bedede, tule Makòke bedede rare. Satanasi heka sòwemy iny ributunykre raaõbinanykremy. Tiiboho sòwemy ihỹre ÿnyra sòwe wese. ⁹Tiiboho tahe ibutu bedede-ò rariarenykre ityhydỹydu hāwā rirurawonyrenyre kia Deuxu hāwā Deuxudeewi wahe. Idi heòty biu-ribi isòrenymy desede. Idi wewòsimy rururenyre, Deuxu iny mahādu òludu wahe. ¹⁰Tahe diabo iitxenadỹydueny heka Deuxu rehure heòty aho-ò. Tai aõnibina, ruimy rybedu-wana juhu delemy tamy reserenyre. Tai txumy rummy aõ rotỹnyrenyhyykre.

¹¹Iribi tahe rynanaurahòkỹmy rabire ityre rỹdu-wana. Suu biu-wana iribi rexitare, titxibo iòrenyre. ¹²Tahe iny rubumy rabire, iny ibutumy iko-ki rỹirennyre. Tyyriti rarayre. Ijõ tahe rarayre, irutyryiti wahe. Tyyriti-ribi Deuxu iaõna aõna rierymy aõhebo risỹnykre. ¹³Ahohokỹ-ribi tahe rubu mahādu dòhònyde. Rubunahakỹ bedede-ribi iludu mahādu dòhònyde. Idi iaõna aõnamyna Deuxu timybo rexinohòtinkyremy idi rare. ¹⁴Idi rubunahakỹ, rubuna-wana heòtyaho-txi idi adehu rỹikre. Kia ixyby rubu rare. ¹⁵Iru ityryiti-ki inyniõ roiòkeki, tii tule heòtyaho-txi adehu rỹikre.

21 ¹Idi biu tỹmyra sutỹmyramy rabire. Juhusu juhubi titxibo ikòrennyre, ahohokỹ tule. ²Deuxu hāwā wihikỹ tỹmyra desemy nade biu-ribi. Iwese ijadõma tỹmyrawesemy ramyhỹre wese kia hāwā nade. Deuxu-ribi nade. ³Tahe rybehekỹ biurynana rỹdu-ribi nade-ò roholare kiamy: —Kahe Deuxu sỹ heka akireny rare. Deuxu ikyreny-ki rarekre. Tii iwedurenykre. Tiiboho Deuxu dee roirekre. ⁴Idi Deuxu irubereny risuhokre. Tai rubu, hii, ibru, txuberere ijòõkre. Bede tyby dori rexihura. ⁵Idi rynana-ki rỹdu narybede: —Wiji itỹmyramy ibutumy aõna aõna ariwinykre. Wadee tule narybede: —Kia bityryitinyke. Kaa rybe dori rybetyhy rare, ibutumy iny ratyhykremy. ⁶Kia ixyby narybede: —Ibutumy relera. Jiarỹ dori AA rare YY rare Juhuludu rare ikonanaludu rare. Inyõ bemomo risakeki, tamy iòwykòlemy ariòkre, beòlònaberu-ribi wahe. ⁷Inyõ tarasadu heka ibutumy waribi rimykre. Jiarỹ

iDeuxukre. Tii wariòrekre. ⁸Idi kamahādu heòty aōho enxofre-ò rekoarenyre kamahādu wahe: —Iny brebu, watyhydỹkōdu, òrarudu, maleerudu mahādu, òta òta mahādu, iny rubudỹdu mahādu, hāri mahādu, ritxoo tyhydỹdu, ruidu mahādu. Kaboho rubunatyhy-ò rururenykre. Kia tahe inatxina rubuna rare.

⁹Tahe ýjuò wadee nade, debò inatxi reurò mahādu-ò. Tii hyna-di ryrireri. Hynawo-ki tahe aōna aōnabina debò inatxi mahādu-di. Kiamy narybede:

—Mana ini, Budoeni hāwyy ini adee ariteòsinykre, hāwyy wese wahe.

¹⁰Deuxu Tyytybytyhy wamy reare. Ýju tahe riwadyre hāwā̀dnora-ò. Jerusalē hāwā̀ tỹmyra awityhy wadee riteòsinyre. Tii biu-ribi desemy nade. ¹¹Deuxu loosna-di yla aōkō. Tii tahe manawiwihikỹ wese rarỹnnyhỹre. Jaspe wese, womati wese mana wiwihikỹ wese rare. ¹²Tii ijòtòbòna irariere, waòinatxi reuròmý ijòtòbòna, iitxedu ýju tule. Ijò-ki tahe waòinatxi reuròmý Judeusỹ mahāduni wahe. ¹³Inataò ijòtòbòna sōwe, iraro-ò, ibòò, biura-ò, beà-ò.

¹⁴Hāwā̀ rurawona tahe waòinatxi reurò mana tyre-ki rỹimyhỹ. Mana sohoji sohoji-ki budoeni deòdu mahāduni rỹire. ¹⁵Ýju wadee rybedu tebò-ki womati tỹrỹrỹhỹkỹ deòho-di nade idi hāwā̀, hāwā̀ ijò, hāwā̀ rurawona iurihinamy.

¹⁶Hāwā̀ tahe iurihina wiwesele rare. Tahe 2.200 iurihixina rimyre teòho-di tuu riwinyre. ¹⁷Rurawona raru tahe ýju taurihixinamy riurihixinanyre idi 64my rimyre. ¹⁸Rurawona tahe jaspe mana-di relere. Hāwā̀ tahe womati tỹrỹrỹhỹkỹ-di relere. ¹⁹Rurawo òraru heka mana wiwihikỹ-di juhumana heka jaspe rare. Inatxina safira rare. Inataōna, agata rare. Inaubiò-wana esmeralda rare.

²⁰Iruyrena sardonio rare. Debò sohoji reuròna sardio rare. Debò inatxi reuròna trisolito rare. Debò inataò reuròna berilo rare. Debò inaubiò-wana topazio debò ituena crisoprazo rare. Wasohoji reuròna jasinto rare. Wainatxi reuròna ametista rare. ²¹Woumanahakỹ sohoji-di heka ijò sohoji sohoji relera, 12my ijò wahe. Ryy heka womati tỹrỹrỹhỹkỹhyky-di relera. ²²Tohodỹna heto tahe ihoòhyyre. Deuxule dori tuu rare, Budoeni-wana. Tai ihoòre. ²³Txuu ahādu-wana tai ijòore Deuxu loosna, budoeni loosna dori itxuuxaranarenyre. ²⁴Bede bede mahādu iloosna-di rỹikre. Bede bede mahādu heka taaōna aōna wiwi-di tamy kidirahukre. ²⁵Tahe ijò raratòbòòhykre, tai dori ruu ihoòhyyre. ²⁶Bede bede iòlò mahādu heka wowydyna-di tamy kidirahukre. ²⁷Inybina bina, iny òrarudu mahādu tamy ralòòtyhy, ruidu mahādu tule. Inyni heka Budoeni tyriti irumy rỹimyhỹre mahādu sohojile wahe.

22 ¹Idi ýju wadee riteòsinyre, iru wahidỹna berohokỹ. Ibelyramy Deuxu rynana, Budoeni rynana-ribi òlòdu wahe. ²Ryrohokỹ tya-di kaa bera namyhỹde iwýòwýò-ki iruwahidỹna bederarade rỹimyhỹ. Tii bederarade waò inatxi reuròmý raratynyre. Kia ta ahādu ahādu-di sohojile raratynyre. Otxirarade tahe bede bede mahādu deytana rare. ³Kia hāwā̀-ki ihetxi txuhòbina tai ijòòkre, Deuxu aò ritxuhònyòra tai. Deuxu ryanahakỹ itya-ki rỹikre. Kia teòdu mahādu riwowydynykre. ⁴Tiiboho iòsỹnny robikre inireny iòru-ki rỹikre. ⁵Tai ruu ijòòkre. Tai txuloosna ijòòkre. Deuxu dori itxurenkre. Tiiboho tai ihyy my rỹikre iwese iòlò mahāduò.

6-7Kia tahe ŷju wadee rarybere: —Kaa rybe tahe inatyhy rybe rare. Bityhynybenyke. Jesuisi rarybere: —Analekre heka tule adehemynylekre heka. Deuxu heka taŷju deòdu adee kanarybekre. Kaheka wylemy ibededŷŷnana kedeakre. Deuxu rarybehyy ratximyhŷre tŷnydŷŷdu mahādu-ò, aòhebo bede rotŷŷnynmyhŷkremy roimyhŷré. Ibutumy kia tyhydŷŷdu mahādu heka reysamy rŷikremy rŷira.

8Jiarŷ tahe Joaò rare. Rabirahe, ibutumy kia raholare. Rabimy rexihurau tahe, jiarŷ watiowotimy resere ŷjuko-txi. 9Ixityre wadee rarybere: —Iwidŷŷomy hewa, Jiarŷ heka Jesuisi deòdu tŷnydŷŷduòle jiarŷ watrixeri. Ibutumy Deuxu tyyriti ityhydŷŷdu biòwa jiarŷ rare. Deuxule bityhynyke.

10Tahe ŷju ijomy wadee rarybere: —Aòbo teritidŷŷnyteri ibutumy iny-ò rybe bitŷnynyke. Kia bededŷŷnana iòhòlemy ratxeri. 11Kia bededŷŷnana kedehemynykreu, aòbina bina widŷŷdu heka aòbinale riwinykre. Iny binabina heka, ibinamy rŷikre iu. Inywiwihikŷ tasŷ awimy rŷikre iu. Kia òbitimy rŷira tahe, awityhymy relekre, òbitityhymy rŷira. 12Boholake warybe-ò, aòwesele heka anakre. Uriòno heka adiwymy wadi anawāhāde. Aòbo wadee aò riwinymyhŷre wahe iwese aòbo riwinymy raremyhŷwesemy heka araòwynykre. 13Jiarŷ heka AA jiarŷ rare. YY tule jiarŷ rare. Tyyriti juhuu rare. Tyyriti konana rare. Jiarŷ heka juhuludu rare. Ihewoludu tule jiarŷ rare, ibutumy wahe.

14Ibutumy tatytyramy rŷira — teysamy rŷira. Tiemy teysahyyhy rare. Iru òwòru wahidŷŷna bederaty heka ritokre. Tule rarònyrenykre kia hāwāhākŷ-ò. 15Ibutumy òrarudu mahādu tule òwòru widŷŷdu tahe irehemy Deuxu hāwā-ribi nyimyhŷde. Tule iny rirubunymyhŷre mahādu, tule suritxoo luunadu mahādu, tule ibutumy ruidu mahādu. Ibutumy irehemy hāwāhākŷ-ribi roimyhŷre.

16Jesuisi heka jiarŷ rare. Waŷju reteònyre adeereny kia aònaaòna bededŷŷnana relyykemy. Kaiboho heka dohodŷŷna heto mahādu-ò relyyrenyke. Jiarŷ iòlò Davi juhu rare, tule Davi riokore rare. Biurasò taina Jiarŷ rare, loosòna rare.

17Deuxu Tyytybytyhy rarybere: —Manake! Tule hāwyymy hābumy heridu tule rarybere: —Manke! Ibutumy ijohodu tule marybeke: Jiarŷ, Juaò, tule rarybere: —Manake! Ibutumy iny bemy rurumyhŷre mahādu tule manake irube biòke. Iòwy-di aòkò heka rare.

18Jiarŷ, Juaò, rarybere ibutumy iny katyyriti rariamyhŷre mahādu-ò. 19Iny ributunyekiki aòmybo kaki ritydŷŷna roiré, Deuxu tamy bededŷŷna binahākŷò riwahinykre karitidŷŷna roireki. Inyò karitidŷŷna-ribi ritakeki, Deuxu òwòru runa ijuraò wahe heka iribi ritakre tule Hāwāhākŷtyhy-ribi nadedi wahe. Tai rŷire tyyriti-ki.

20Tule aòmybo narybede inatyhymy tule rarybekre (Jesuisi wahe): —Analekre hewa idi. Araroorehenyòtyhy. Juaò, tule rarybere: —Kie, Manake Wanyrŷ Jesuisi.

21Deuxu deysana, Inynyrŷ Jesuisi Kristu kia deysana ibutumy adee kanakremy watxiwahāre.